



Қ А Р О Р И

2020 йил 2 октябр

№ 78/13

Туманда ғаллачилик йўналишида кластер ташкил этиш тўғрисида

Туманда қишлоқ хўжалиги соҳасини диверсификация қилиш орқали бошоқли дон экинларидан юқори ҳосил олиш, паррандачилик, чорвачилик ва балиқчилик тармоқларининг озуқага бўлган талабини қондириш, ишлаб чиқариш ҳажмини кўпайтириш ҳамда қишлоқ хўжалиги маҳсулотлари етиштирувчиларнинг иқтисодий манфаатдорлигини ошириш мақсадида, халқ депутатлари Булунғур туман Кенгаши

ҚАРОР ҚИЛАДИ:

1. “Waves Investment Cluster – Tashkent” МЧЖ директорлар кенгаши раиси Бабажонов Ислон Алимовичнинг 2021 йилдан бошлаб, бошоқли дон етиштирувчи фермер хўжаликлари билан бошоқли донни шартнома асосида харид қилиш орқали ғаллачилик кластерини босқичма-босқич ташкил этиш тўғрисидаги ахбороти маълумот учун қабул қилинсин.

2. Туман Қишлоқ хўжалиги бўлими (Д.Сулаймонов), туман Иқтисодий тараққиёт ва камбағалликни қисқартириш бўлими бошлиғи (М.Раджабов), туман ҳокимлиги Молия бўлими (Ж.Нарзиев), туман Фермер, деҳқон хўжаликлари ва томорқа ер эгалари кенгаши (А.Пўлатов), туман Ветеринария ва чорвачиликни ривожлантириш бўлими (Х.Худайназаров)ларнинг 2021 йил ҳосилидан бошлаб, бошоқли дон етиштирувчи фермер хўжаликлари билан чорвачилик, паррандачилик, балиқчилик хўжаликлари ва бошоқли дон маҳсулотларини қайта ишловчи корхоналар томонидан бошоқли донни етиштириш ёки шартнома асосида харид қилиш орқали ғаллачилик кластерини босқичма-босқич жорий этиш тўғрисидаги таклифлари маъқуллансин.

3. Туман Қишлоқ хўжалиги бўлими (Д.Сулаймонов) ҳамда тумандаги таъминотчи ва хизмат кўрсатувчи ташкилот раҳбарларига 2021 йил ғалла ҳосили учун сарфланган харажатлар бўйича тегишли тайёрлов, таъминотчи, хизмат кўрсатувчи ва тижорат банклари билан ташкилотлардаги ҳисоб китоблари юзасидан ўзаро солиштирма далолатномалар тузилишини таъминласинлар.

4. Ғаллачилик кластерини ташкил этиш ва фаолиятини йўлга қўйиш қўйидаги шартлар асосида амалга оширилиши инобатга олинсин:

ғаллачилик кластери ишлаб чиқариш (хизмат кўрсатиш)нинг замонавий инновацион технологияларидан фойдаланган ҳолда бошоқли дон етиштириш ёки уни шартнома асосида сотиб олиш, саралаш, сақлаш, қайта ишлаш, тайёр маҳсулот ишлаб чиқариш, ички ва ташқи бозорга етказиб беришни таъминлайди;

ғаллачилик кластери иқтисодий жиҳатдан барқарор фаолият юритаётган, зарур инфратузилма объектлари, шунингдек, мол-мулк ва бошқа воситаларга эга

бўлган, биринчи навбатда, салоҳиятли чорвачилик, паррандачилик, балиқчилик хўжаликлари ва бошоқли дон маҳсулотларини қайта ишловчи корхоналар томонидан ташкил этилади;

ғаллачилик кластерининг фаолиятини ташкил этиш учун алоҳида норматив-ҳуқуқий ҳужжат қабул қилиниши талаб этилмайди, хорижий инвесторлар иштирок этаётган ғаллачилик кластери бундан мустасно;

ғаллачилик кластерига ажратилган ер майдонларидан бир йил мобайнида фойдаланмаслик, тупроқ унумдорлигининг пасайишига, кимёвий ва радиоактив ифлосланишига олиб келувчи усуллардан фойдаланиш ҳамда мазкур қарорда назарда тутилган мажбуриятларни бажармаслик, ер участкасига бўлган ҳуқуқни бекор бўлишига олиб келади.

5. Туман ҳокимининг ўринбосари (У.Алиев), туман Қишлоқ хўжалиги бўлими (Д.Сулаймонов), туман Ер ресурслари ва давлат кадастри бўлими (А.Нарматов)лар:

ғаллачилик кластерига ер майдони вилоят ҳокимлиги ва ташаббускорлар ўртасида ёзма равишда тузиладиган битим асосида Вазирлар Маҳкамаси билан келишилган ҳолда ажратилишига;

хорижий инвесторлар иштирок этаётган ғаллачилик кластерига ер майдони Ўзбекистон Республикаси Қишлоқ хўжалиги вазирлиги билан тузиладиган инвестиция киритиш тўғрисидаги шартнома имзолангандан сўнг Вазирлар Маҳкамаси томонидан ажратилишига;

бунда, ғаллачилик кластерини ташкил этувчи ташаббускор томонидан тегишли равишда вилоят ҳокимлиги ҳамда Ўзбекистон Республикаси Қишлоқ хўжалиги вазирлигига қуйидаги ҳужжатлар тақдим этилиши юзасидан белгиланган тартибга амал қилсинлар:

ғаллачилик кластерини ташкил этиш бўйича ариза;

юримдик шахс давлат рўйхатидан ўтганлиги тўғрисида гувоҳнома;

ғаллачилик кластери фаолиятини ташкил этишда фермер хўжаликларида бошоқли дон етиштиришни молиялаштириш, ғаллани қуритиш, сақлаш, қайта ишлаш ҳамда сувни тежайдиган технологияларни жорий этиш бўйича инвестиция лойиҳаларини амалга ошириш юзасидан бизнес режа ёки техник-иқтисодий асоснома;

ташаббускорнинг банкдаги пул маблағлари айланмаси тўғрисидаги хизмат кўрсатувчи банк маълумотномасидан кўчирма;

ғаллачилик кластерини фаолият юритиши учун зарур инфратузилма объектлари (шу жумладан ижара асосида), шунингдек, мол-мулк ва бошқа воситаларнинг мавжудлиги ҳақида маълумотнома.

ғаллачилик кластери фаолияти мониторинг қилиб борилсин ҳамда 2021 йил ҳосили якуни билан улар фаолиятини такомиллаштиришга қаратилган тақлифлар ишлаб чиқсин;

ҳар йили 1 сентябрга қадар келгуси йил ҳосили учун ғаллачилик кластерларини ташкил этиш бўйича тақлифларни тайёрласин.

6. Ушбу қарор ижросини назорат қилиш халқ депутатлари Булунғур туман Кенгашининг Қишлоқ ва сув хўжалиги ҳамда атроф муҳитни муҳофаза қилиш масалалари бўйича доимий комиссияси раиси С.Товбаев зиммасига юклатилсин.

7. Ушбу Қарор қабул қилинган кундан эътиборан кучга киради.

Туман Кенгаши раиси:



Б.Бахрамов